

四庫全書

集部

欽定四庫全書

弇州四部稿卷六

明 王世貞 撰

詩部

擬古樂府四十七首

僊人篇

結茅華山顛上有蒼鱗車僊者四五人要我偕所如邀
游天漢上經歷萬里餘人間所見星乃是千白榆玫瑰

切庭階木難交綺疏不知何宮殿但恠非人居呀然珠
簾起四角垂流蘇中坐太乙君夾侍青童姝飲我丹霞
漿令我易肌膚碧藕錯朱桃玉饌芬且腴天樂不能名
但用窮歡娛回首望故鄉妻孥不得俱坐此一念謫聊
復在泥塗疆疇雖歷歷他姓治田廬欲返渺何因惻愴
但含吁

豔歌行

手種梧桐樹竹實何累累綠葉間紫莖玄露自垂飴不

為游居念但願鳳皇來鳳皇不相顧但見烏鵲羣爭栖
一何喧逐令為伐倒此樹烏鵲驚飛向天悲南山五丈
鳥自稱為鳳皇聽此梧桐竹實千里飛相從下覩荒疇
何依百鳥拱之繚戾而徘徊烏鵲得志鳳皇疇歸終始
失據曷已心悲

豔歌何常行

生男不為貴都尉執金吾生女不為貴小者號婕妤不
為家人產鄠杜十頃餘不為富第宅寶玉廁門樞鳴鐘

會子姓列鼎薦膏腴溫爽易炎寒懼宴亂昏晡醉履不
及塵妖姬遞來扶妖姬十四五顏色勝羅敷但願長如
是不願更何如

折楊柳行

曷不為男子不覩苧羅村種蠡兩謀臣不能勝婦人一
解齊謳走仲尼秦樂逐由余但施婦人巧賢聖亦不如
二解絳灌及樊鄴手扶漢天子匈奴北方來不如一公
主三解東家有匹雛北者亦司晨西家婦女坐牀上男

子拜伏堂下塵

四解

淮南王

淮南王習長生金已玉鼎琉璃餅珊瑚抄藥飛雪輕役
屬草木盡成兵前殿赤節後園輜輶八公先導之鏘球
瑟琴相諧鳴青鸞白鹿雜沓迎生漢藩不為臣見上帝
稱寡人守厠三載多苦辛曷不忠孝位天真

隴上壯士歌

隴上壯士南安陳便便腹幹藏千人繡袍窄袖黃金鱗

雙虹燭燿盤秋旻大刀蛇矛近輒嗔何來一校交逡巡
蛇矛去腕刀不神讐爾驍驄跡何新可憐養士同心肝
死者隴上生長安西吹晨風東逝瀾為爾抵節歌盤桓

行路難

寒不入阿房中春不出輪臺東輪臺豈無春層冰礮砢
焉能通策駕馬上劒閣懸度絙索貫復窮發白帝下峽
江以風目不得瞬飛不得同人生本末竟焉岐積賤累
榮各因之南山有鳥易鳳皇毛羽剝落便摧藏行路難

君自傷

又

虎肉同類更向騶虞驕鴻飛大冥鵲鵠招神龜刺促化
陽鱈銷冶干將成鉛刀黃金山重義秋毫坦坦天衢趨
俠邪前車軸折後爭誇不臣縣官臣私家珠琲絡鈎于
闐珂意氣悅懌若春花月請十百恒苦饑名刺漫臧竟
安之後衣露脰冠達鬕崩緇一彈幡哉歸行路難君自

悲

又

陸不必車崑崙水不必航扶桑恩愛苟一虧咫尺天茫
茫三殮詣莽蒼其腹猶果然安能殮風吸露窮歲年縱
有王子晉安得日日好容顏出門各自顧他人肯容恤
千言成桃李一言變荆棘白刃如雪金如丘俠客報恩
行報讐不在里巷間多在長安之道周行路難君自愁

秋閨曲

葯房秋深獸金環美人參差語霜寒深淺自當竟何言

戚戚準君道途間江有鯉魚哉山雖欲裁信逝無還
鳴蜩肅然損朱顏蕙草三枯折復捐安得明鏡長少年

又

三星灼灼照鳴機素腕盈盈出絳帷夫君何在在遼西
夏裁霜衣冬裁絺以此及君猶後時惟昔羅穀迫參差
忽來酒間山嶽移愴若庭前丹桂枝難何榮茂易何衰

白苧詞

美人含嬌出中堂鳴環飭步齊宮商流目一盼自餘光

恍若輕雲扶太陽娛君青春志意荒白日易短夜難長
絃迫柱促樂漸終鞏鑑掩收意煩忡安能雙駐酖顏紅
又

美人列行燭明輝絲揚肉奮技爭馳中有纖娃字夷施
蘊香含粉天然眉流星迴月秋山低輕絃手語私念之
令君抵節復沈吟悵結心志內不禁安能雙飛度遙岑
隔谷歌

兄在城中弟在野饑食水寒衣火晝行羅飛夜掘鼠救

我來救我來

弟為官人兄束縛鵲鴿雙飛何刺促一邁羅網一飲啄
安用生死長相逐

鬪雞篇

雄吹間清鼉列綵冠長筵上客不言快主請更樂端金
骹抗高尾介距何軒軒虛憍爭恃氣竦立怒仍專星炬
閃朱眸颺輪搏雙拳膝血何灑澁莪冠圻如蓮為君效
一決微命安足言寧如東郊雉伏竄受人憐

箕山行

唐堯厭九有授舜中復疑顧謂許武仲為我一代治對
坐平陽宮北風吹茅茨武仲仰天笑咄嗟長眉兒吾寧
箕山餓如此天下安用之富貴日以濃志意日以移老
朋長守藏仲尼但栖栖前人自尊後人愈卑大鵬橫空
鷗鷯一枝鷗鷯徘徊誤嚇老鷗所憐寂寂挂瓢意猶有
千秋清潁知

華周杞梁行

有序

見林提學談華周杞梁妻事有感於衷遂成一章
華杞感賓車駢刀燦雙纓長驅蕩莒師千里不留行豈
為齊君死肯負隰侯生二發爭寫哀中夜不絕聲皇天
為摧噫百雉拉然崩朋友自有心夫婦自有經始知乾
坤大不勝一寸誠二綽豈不雄惜哉殉淫朋毋以鴻毛
重遂令泰山輕

瑩篋謠

公無渡河咨咨河波生鱗公無渡河咨咨河伯不仁公

不知今渡河而公溺之妾知公兮非茲流誰與歸嗚呼
噫嘻

雞鳴歌

銀河迢迢星爛爛汝南鳴雞夜將半行人出門中道歎
欲歸不能何時旦曲陽酒酣起更衣新聲乍移霜乍飛
輕薄篇

末俗誇輕薄輕薄生有餘驕意盤眼睫貴骨滿頭顱仲
氏二十石伯兄千戶侯小弟頗妍好出入嘗奉車大母

脩成君女姊班婕妤問我湯沐邑鄠杜最上腴問我無
名錢勅賜蜀山鑪從奴衣火浣下客躡真珠丸金彈飛
鳥椎鐵擊珊瑚揮霍和氏璧蹠躐大宛駒臂鷹出長楸
鬪雞絕九衢帝油雨擊鞠席綺寒擣蒲調笑採桑婦闌
入酒家胡腰間雌雄劍雙雙玉轆轤一日不出匣中夜
自鳴諱破壁藏翁伯罵坐輕灌夫七貴為低眉將相薄
不圖不禮關都尉可怕執金吾道逢談天者復矜意氣
殊千秋若指掌九州不足居一言無騷雅隻字奪典謨

李耳老禿翁仲尼亦豎儒
謦欬細旃表立可成唐虞
飛書招越裳挾箠鞭匈奴
寧必卿曹子飲啗類屠沽
相睨不相下異路請各趨
擾擾兩蜉蝣自貴亦自愚
寧知青門土賢豪始同途

夜坐吟

唧唧夜蟲吟起我東西南
北心丈夫戶庭間行窮越
萬度天山高枝肅肅留遠
風追我少年及老翁鄰家
有酒沽不得豈須道途凋
顏色

饒歌短簫曲

太白蝕月條支息烟積雪數丈高沒祁連鳥獸蜩縮不
得前穹廬兩三沐星懸單于今何適休屠日逐左右賢
谷蠡當戶兩莫韃曷不度漠而南逐水草漢兵咆哮正
當道頗聞置三將軍其一猿臂疾若飛大者善射習兵
機小者號嫖姚天子最親信多神威射生超乘良家兒
衽金浴鐵設長圍六畜孕殯馬弱不得逐歸來祭天金
人曷屬寡婦抱兒哭哀哀死喪勢不復唯有中國萬里

長偃兵革皇帝置酒羣臣懽樂無極

東武吟

罷鳥厭離枝罷客厭離鄉聽君行泣復坐訴令我斷絕
少年腸始從張侯號博望尋源鑿空竟西方問君何所
歷身毒安息大月支問君何所見深目高鼻卷眉髭其
人何所瑤葡萄汗血香都夷其俗何所尚嗜利輕殺易
漢兒結營勃律河士卒樵汲供炊糜斧冰十指半墮落
又有猛獸搏食之經行十三載皮肉消盡餘音聲音聲

固未改舌強亦難明忽覩鬼我之宮闕不敢遽謂長安
城不知張侯見天子何所言獨封大邑金帛蕃甲第亦
軒軒餘者公車門十上不得論最後稍為郎給錢十萬
令還鄉廬井漸非故急欲問爺孃行逢耆舊為相指雙
塚纍纍置道旁新婦逐他人他人生兒已扶牀對訖始
大悲耆舊內相疑別時朱顏復鬢鬢今來其人鬼邪非
又聞甘泉宮召按西邊事鄉導不乏興應須故時史家
鄉空蕩盡枯骨終遠棄吁嗟哉大夫功成差足樂不如

貧賤傭力作

猛虎行

北山饒風雪東山西山多網羅唯有南山足樵採其若
白額斑文之虎何嗟虎胡乃白額而斑文目為流電颺
若奔低頭前告言汝虎既為百獸之王奈何搏噬絕其
羣不見鳥中之鳳饑食竹實衆羽自歸尊神龍變化豈
後汝魚鼈煦沫相和訴虎對之若不聞咆哮木葉風紛
紛但欲得汝充虎腹安用繁辭訴苦辛天造萬物豈為

人上窮決曠下沈淪巧網必遂私其身況爾同類多相
食虎一食人何遽論

東飛伯勞歌

伯勞飛東燕飛西馬頭兒郎機頭妻機聲軋軋馬鑿落
願得兩風併吹却織師誤教織鴛鴦令我厭取向流黃
兒郎三十年尚未珊瑚具裝藕絲轡銀鐙碧篆溫春宵
俱留可憐向誰驕

結客少年場行

驄馬玉連錢流蘇障泥瑪瑙鞭經過五陵畔結客多少
年如澠之酒傾肯惜突兀黃金若山積散盡姓名都不
問肝膽但許英雄識扶風夜深雪花白手提人頭刎君
側為君報讐身併擲細看乃是當時客君不見東家錢
刀坐朱紫魏其為朝武安夕如此結交竟何益

登高丘而望遠海行

登高丘而望遠海秦王者何二千載阿闕王基竟已灰
瀛洲僊藥空誰采初從梁甫匱金書七十二君俱不如

已借神鞭驅怒石復張連弩射游魚歸來盡滅儒生口
徐市茫茫竟何有祖龍未朽驪山身亡鹿先歸赤帝手
赤帝諸孫猶不聞文成五利日紛紛請君試上長安問
唯有甘泉一片雲

長相思

長相思望難期美人如花隔深閨輕霜剪澁凝臙脂青
黃碧綠諸色絲織成鴛鴦心自悲兩心為一心明月照
秋水一心成兩心各懸三千里昔為比翼鳥翼折不能

飛今為雙星界河漢
年年夜夜盼光輝

楊白花

宮中小女髻如鴉
連臂蹋足唱楊花
唱得楊花渾勝雪
不知飄向阿誰家
塞北江南望何極
衡道藏鴉白門色
沙深日冷不得青
獨抱長條三歎息

陽春曲

漢女三千人一一盼
陽春花開不見日
愁遶翠蛾顰君
王雨露在一身
那得徧灑東門塵
君不見趙家姊妹王

不如昭陽乍親椒殿疎何況增成班婕妤

雙燕離

雙燕若雙剪翩翾吳王宮自願同生死歲歲掠春風吳
宮火起焚其雄雌鳴啾啾入棘叢曷不從新鰥翼物微
心重挑不得今春共銜泥明春黃口血灘漈不如廬江
小吏婦猶勝會稽太守妻

于闐採花歌

于闐採花女採花置瓶中三日花憔悴紅顏翻更紅明

年花縱破的應不勝我明年更明年漸不勝花妍西頭
黃金輪東頭白銀轂人生顏色得堅牢何必勃律河中
三尺玉

中山孺子妾歌

中山孺子妾出自君王宮玉蕊墮九天猶能挂簾櫳不
見東家兒邯鄲才人廝養妻朝來繫馬棧生割流黃帷
江姬屈陰姬伸屈伸有奇亦有真犀角偃月為何人

臨江王節士歌

臨江國城多俠兒
翺翹錦韞冠雄雞
跪推王轂中尉府
中尉府前烏夜啼
不如蜩晰江頭燕
猶解銜來墳上泥
夷門少年隱酒屠
將身付心心不孤
淮南金椎辟陽顱
匈奴偶人射郅都
若曹冠韞胡為乎

山人勸酒

日邇不憚披尋幽
淪道逢山人被山
衣巾酌我葡萄九
醞之美酒盛以癭
藤五華之靈尊盡
傾尊中酒為唱青
天歌一歌還一杯
柰此青天何踞坐
問山人汝今欲何

為行將出山去搏弄造物為嬰兒四皓歸來駮瘰頭皮
赤符自新紫芝已萎羔鴈三至臥龍遂起行雨不休卒
以喝死天施白玉棺生瘞王子喬何如留此口時進美
酒長逍遙欲知出山者我是悔不老作吳山樵

日出入歌

日出東暘谷赤若赤瓊轂日入西虞淵潁若潁玉盤空
中日稍定團團黃金鏡南陸令我暖北陸令我寒寒暖
嗟自可為汝銷朱顏但見日出入不見日後先長歌出

入歌起我長恨端

結襪子歌

小吏摩足日腐儒結襪時張家兩傖父不復顧腰肢博
得公卿名且為帝王知男兒事事仗人口安用區區七
尺為自斟自咏自老死從他門外浮雲馳

秦女卷衣曲

萑陽宮中漏未央熒熒初月麗初粧此時秦女喚梳沐
此際淚濕羅衣裳邯鄲倡姬秦國母秦王相國邯鄲賈

邯鄲大賈秦仲父仲父舍人秦假父可憐君王才十五
秦女賤趙女驕寄生蒿蘿出松標耐向民間擊土缶難
同貴邸伴吹簫

行行且游獵

行行且游獵遂出光祿塞秦地一掌間黃河落天外六
郡良家五陵豪于闐玉鞭大食刀不愛縣官封博望自
從私客取臨洮盤馬彎弓月相向萬族蹕蹕魄先喪突
出霜蹄狡兔先爭看鳴鏑蒼鷹上黃沙一縷衝紫微角

聲四起胡霜飛少年割鮮且莫飲待我生挾單于歸

採蓮曲

蘭為楫桂為橈青絲竿沙棠舫十五女兒茜紅綃輕裾
明璫芬自飄花深葉高柰何腰中有文鷲並逍遙紅藕
綠的一雙嬌迴眸誇君心語要何意水長不通橋橫塘
別浦多風潮稀星薄露夜迢迢

梅花落

牕外梅花落遼西尚未歸霜風吹玉笛寒月滿金微此

際征人幕應同少婦機那堪驛使斷心逐嶺鴻飛

銅雀伎

往事秦雲逝深恩漳水流月歸金鴈冷風至玉衣秋粉
黛年年薄絃歌夜夜愁誰同漢武帝還向茂陵游

其二

奉寢傳遺教分香更繫情履猶明主跡絃是向時聲寂
寞無新故榮華有重輕尚疑僊樂動別院夜相迎

愛妾換馬

只解驅馳易寧言離別難
蘭膏啼玉筍桃雨汗金鞍
物喜酬新主人悲戀故歡
橫行度遼海那問剪刀寒

夜夜曲

夜夜連枝帳不復知惆悵
夜夜同心綺亦復忘歡喜
唯有夢梁州追歡更解愁
匡牀涼似水初月澹如鈎

小垂手

小院炙瑤笙紅粧按隊呈
都將蘭麝口吹作鳳皇鳴
曲終仍教舞垂手故盈盈
詎是長持履臨風驕怨聲

大垂手

秋水剪明眸亭亭出畫樓邀他大垂手不惜錦纏頭舞
罷香無跡歌殘翠未收留髭燭盡滅更與按伊州

樂府變十九首

有序

古樂府自郊廟宴會外不過一事之紀一情之觸作
而備太師之采云爾擬者或舍調而取本意或舍意
而取本調甚或舍意調而俱離之姑仍舊題而創出
吾見六朝浸淫以至四傑青蓮俱所不免少陵杜氏

迺能即事而命題此千古卓識也而詞取鍛鍊
肯求爾雅若有乖於田畯紅女之響者余束髮
操觚見可詠可諷之事多矣間者掇拾為大小
篇什若干雖鄙俗多闕漏要之庶幾一代之音
而可以備采萬一者故不忍棄而藏之

治兵使者行當鴈門太守

今皇帝時治兵使者任君繇別駕稍遷別駕坐府儼若
明神大吏畏公小吏畏民

一解

倭奴揚帆來疾如衝飈

殺掠吏士奉首伏逃任君當之數折其驕

二解

殷殷師

鼓任君在先鉤鉤師金任君在殿止若春風動則夏電

三解

士女避敵走不敢開門任君令開門全活千萬人

生我父母存我任君

四解

入夜不宿或晝輟殮冑而拊

循挾纊一言願與同死不靳獨全

五解

賢哉我師任君

媼死不歸墨而戎經慈母令子明君良臣

六解

輯兵持

服舍車而徒老弱奔走巷哭旅呼家斲一木以像君軀

七解

天禍王室早就奄迷何以祠君姑蘇臺西千秋萬

年俎豆其間

八解

白日引

白日燭天被八方穴鳳數龍來游翔三事庶尹萬友邦
靡尸不鰥徵俊良將作少府六局坊一切報罷諸不詳
封墓式閤直諫彰四門大闢晨煌煌皂囊白簡紛縱橫
單于谷蠡左右王解辦頓顙稱恐惶鯨鯢戢甲波不揚
公卿上壽報舉觴隆慶天子坐明堂

壽寧泣

何當快樂無憂長兄太師上公小弟太傅徹侯太后不
避傳姬兩宮睥睨參差中外聒嚚憂疑有妄男子數人
上書告密紛紛緹騎東西逐奔黃金大貝明珠木難火
齊珊瑚散入咸陽賈胡兄弟駢首琅璫太師奪封道亡
小弟殺人坐償念昔蒙恩紫宮左掖夜啟銅龍亡酒不
論椒風君心頃刻萬端何況彼此異天掩袂飲泣重泉
敬謝太后主臣在昔王法無親大德不德奚論

尚書樂

揚翠眊曳金支馬駸駸車逶迤手將兩黃鉞大者誅二
千石小者僇偏裨九卿班餞日崦嵫相君昵昵前致辭
尚書行出師樂哉尚書柰樂何

一解

所過二千石喪魂

魄日夜輦重稱軍食黃金如山莫譙訶累女對對嘖青
蛾回鶻小隊桃葉歌中丞奉觴舞迴波樂哉尚書柰樂
何

二解

大宛驄珊瑚鞭天吳繡蹙當胸盤麒麟玉刻稱

腰圓珍恠百寶裝千船席捲三吳向青天九卿班迎晡
不得前相君昵昵前致詞中官黃紙紛而馳尚書告班

師樂哉尚書柰樂何

三解

朝賜尚書夕讌尚書尚書第

中錦不如檀牀八角垂流蘇紫衣屏息駢街衢欲進不
進足次且左右十二波斯胡平頭奴子貂襜褕醉着不
下公侯車樂哉尚書柰樂何

四解

雲霾辭天雨洗白日

詔收尚書下請室削之歸一官不得著昔來一何駛今
歸一何疾念欲乘柴車病不得驅欲呼估客舟估客不
肯相於嬖女詈罵小兒拍手擲揄道逢九卿脾睨之謁
辭相君相君新門十二重東流之水西飛鴻昔日父子

今華戎樂哉尚書柰樂何

五解

將軍行

婁豬化為龍頭角故不分貪狼長百獸那不食其羣有
何短老公自稱大將軍從兵三十萬華蓋若飄雲尺一
丹校篋細刺蛟螭文一署臣某字直入銅龍門忽開青
天笑雷公不得聞前驅碧眼兒慣騎大宛駒與公同臥
起錦帶貂檐褕朝令謁天子暮令拜單于單于開篋看
中有尺一書織成紫羅縠恰恰覆穹廬犀毗黃金造密

嵌珊瑚珠團龍五色帛百匹為一角單于大懽喜親為
割肉炙小婦彈琵琶大婦奉羊酪手取一束箭墨文何
錯落為語而將軍物微意不薄箭鋒但相近各各相引
却歸還告將軍將軍大懽喜今年敵却去好復開茅土
幕府上功簿兩兩對金紫鬼伯何催促將軍向蒿里嚴
霜一夜零華堂遍荆杞翩翩執金吾緹騎類貌虎急為
發其私丞相下御史支磔將軍骸分梟十二邊車裂兩
分張剝肉施烏鵲紅顏夫人頰懸首映旌旃白面羽林

郎含咽向重泉小女配人奴歌舞侯家筵田園億千彊
各自稱新阡生為衆人恨死為衆鬼憐寄語二心臣貽
臭空萬年

越臺高

越臺高高以臨吳會下視嵒我千艘萬艘來不知外戟
如霜礮如雷婦女纍戟底丈夫頭懸戟支遙問乃是故
鄉之人何畏哉遙問乃是故鄉之人何畏哉男兒生世
須黃金令汝稠載歸男兒但得多黃金安用刺促鬪爭

為大夫坐越臺中央諸君但坐兩頭織成氍毹錦地衣
流蘇八角珊瑚鈎酌大酒烹肥牛諸君但坐兩頭為汝
楚歌不得休下有一百二十紅粧瓊枝盞葉搖明璫枝
枝玉相對葉葉翠相當銀燭迷離復昏黃共醉捉大夫
不知大夫在阿旁衆中有小女自名董妖嬈入門拜大
夫刺刺重恍恍出門拜大夫施施重蹻蹻十疋紅番羅
下壓銀狻猊上有大夫字但受不得辭鼓腫臃報出日
詔書來衆縮瑟大夫笑謂諸君但坐無所苦長安相君

日卓午越城機軋軋旦莫為相君織作何所苦黃金南
北走大夫中央臥御史濡沫不得禡

欽鵒行

飛來五色鳥自名為鳳皇千秋不一見見者國祚昌饗
以鐘鼓坐明堂明堂饒梧竹三日不鳴意何長晨不見
鳳皇鳳皇乃在東門之陰啄腐鼠啾啾唧唧不得哺夕
不見鳳皇鳳皇乃在西門之陰媚蒼鷹願爾肉攫分遺
腥梧桐長苦寒竹實長苦饑衆鳥驚相顧不知鳳皇是

欽鴟

金吾緹騎行

緹騎一何飄飄輕裘怒馬上蘭念欲陸海沈山金吾府

中大難

一解

城南老姥雌孤生有剪頭吃雞凌晨出游

逮晡乃從緹騎游趨

二解

教以胡言數言金鼓縛送統

統將至大司馬門太保首功次論

三解

廷尉當之五刑

血肉模糊吞聲東市烹羊宰牲西市擊鼓吹笙

四解

爭

賀緹騎還來男子步武崔嵬罷歸拊心徘徊兒今出入

危哉

五解

鈞州變

富貴且莫求貧賤且莫憂奉君一卮酒為君奏鈞州鈞
州先王日恩寵冠諸侯斗大黃金璽真人刻上頭下令
黔黎伏上用神鬼愁後宮五百人一一玉搔頭工作倖
尚方永巷儼長秋枚馬不足譚八公日從游守令惕惕
來白事長叩頭御史昂昂來旬月論為囚數極終有歸
襖至不自謀急風覆破檣天火燒枯桑前人抽棟去後

人壓空房可憐少年子急利好兒郎深宮不足居要走
高皇鄉紅粉厭為土改作估客裝謬稱平陽騎去狎秦
淮倡秦淮歡不足邏騎忽縱橫旦夕長安道冠蓋鬱相
望中坐中貴人貂裘金左璫先收真人璽後奪諸王章
昔日甘泉殿千里若咫尺今日未央門一叩不復得手
種桃李花須臾變荆棘投書太保府行金丞相宅但進
不復論杳如海沈石四門陳刁斗擊令心腸圻難犬寂
無聲幸弄爭逃匿掩泣復沈淪洒謂衆夫人昔忝千乘

主安能縛輜輪誰言乃公勇千載不復晨但沒從我去
存者他人親華容慨起舞虞姬絮前陳急風覆破檣疇
不餒饑鱗天火燒空桑女蘿亦見焚引頸各高懸舉宮
向沈淪我欲竟此曲罷曲涕泗漣日月與雷霆往往任
高天

江陵伎

江陵伎人子掩袂作啼聲家家叉簾立送王上臺城一
解王欲別太姬門前黃紙催出亦以徘徊入亦以徘徊

二解 王入臺城後不省作悲啼粧臺鉛粉驕別接治游

兒

三解

朱門一家哭萬家得安宿一家亦不哭太姬方

散粥

四解

門外雙鳥栖啞啞枝上啼官今當大赦不願

赦王歸

五解

二十四皇孫譬如南隴樹一半枝撐天半

不知變處

六解

白蓮花

白蓮花捧世尊左跪聖母右拜神君蓮花水浴金盆男
女行照之女為后妃男侯王金貂羅紈耀雨行生當踏

玉階死當坐天堂誰為遣汝來丘太師周太師卻立那
顏東西授汝尺一錦牘赤白號帶兩頭垂但入上谷雲
中得好兒郎因依精兵十萬騎一一銜枚後頭隨天運
好反覆白發所謀私反接向市中號呼衆男女曷不救
我為救我死者坐天堂生當踏玉階忽有一書生衆不
識為誰書生從何來乃是闕下上書男子長流關外醉
臥闌闌間夜半縛致之桃李種山岡蓮花種湖陂刺舟
摘蓮花却折桃李枝東市標書生頭鼓曠曠使者輜千

金賞萬戶侯道傍跌足涕被面中丞封御史轉丞相閣
中三日宴

凌節婦行

鬱鬱九里松雖悴不改真五尺無瑕璧是君百年身明
明兩高月不受浮雲侵寸鍊成寸丹是君百年心膏沐
辭鏡臺髣髴澁金剪白雪白雙蛾是君訣時面丸膽佐
朝餐當食何大苦雖苦不如汝是君訣時語昂藏二千
石鬢鬢頗有髭橫金照里閭是君襁中兒始諷栢舟篇

載陳斷機言應知循吏傳當歸列女編

莫州謠

兄何在南伐吳弟何在北幽都老父何在呼役夫少婦
具晨鋪大婦行喚姑行喚姑姑不起溺床下波瀾瀾

小兒謠

木稼木稼胡不日稼

其二

誰謂瓜土而實其李誰謂卵小而大其子

其三

一虎挾兩羊後有乳贗不可當

其四

有蠹嚙棟幾其隳兮吁嗟隳兮子安歸兮


其五

猴而冠者酣耶虎而冠者耽耽耶

乙卯市人謠

日蝕不吐社人奏鼓大婦輟漿小婦輟哺昨日之日汝

于何所迴光不矚焉為救汝



弇州四部稿卷六

欽定四庫全書

集部

弇州四部稿卷八

詳校官侍讀學士

臣陸伯焜

中書

臣

劉源溥覆勘

總校官原任中允

臣王燕緒

校對官檢討

臣盧應

騰錄監生

臣許溶

欽定四庫全書

弇州四部稿卷七

明 王世貞 撰

詩部

擬古樂府一百八十五首

瑯琊王歌

小女十四五許嫁瑯琊王新婚呵殿來舊婚趨道傍

其二

女兒年十三手種銀杏樹銀杏已結子問母還女處

其三

瑯琊騎兒馬七尺銀纏驥不能上天去對人呼作龍

其四

十日教新聲呼瑟捧來箏非無好顏色難事瑯琊王

其五

三錢買屠刀日日將殺猪東家有寶劍七世匣中居

其六

種苗高山顛下蔭松栢樹大姊兒郎妾妹是兒郎婦

其七

要識瑯琊門前有石虎卧黃金東西來及門不得過

其八

人是官家人馬是官家馬原不屬女郎安能不相舍

企喻歌

男兒好橫行橫行自身樂那見摩天鵠結伴尋鳥雀

其二

女子愛粧束粧束頭上釵男兒愛粧束粧束坐下騎

其三

以大羽哥試君鐵柄襠兩家俱言利那得無一強

其四

饑拔兩刃刀割肉行自吞情知饑難忍不擬受人恩

黃淡思歌

歸歸黃淡思百結繫郎衣歸歸黃淡思千結繫郎足

其二

與郎指刀頭明鏡中天流一夕深一夕明鏡化為鈎

其三

黃金將作盃獨飲不得滿白玉將作床獨眠不得長

其四

床盃忽光輝報郎騎馬歸

地驅樂歌

穹沙大瀦天公糝糊逐得一羊走死一駒

其二

媼愛小女不願女苦願女成長多得夫婿

其三

頭上倭髻珍珠纍垂要郎解髻妾自解衣

其四

願為郎席不願為被得郎在身勝郎下睡

其五

郎騎白馬妾坐車偷眼少年郎不如

慕容家自魯企由谷歌

人言慕容惡慕容劇不惡鳳皇化鵲象生緣好逐雀

隴頭歌

隴水霏微望如一絲中有百調令人傷悲

其二

將刀畫水水斷不流男兒心腸不在眉頭

幽州馬行客歌

為郎閨中婦不若轅下駒百金買鞍韉十金買轡頭

其二

愛馬有何好馬走千里道郎但不出門那得顏色老

其三

女郎初嫁時日日稱阿母女郎抱兒歸日日稱兒父

其四

郎贈倭墮髻妾報倭墮髻知郎非女娘郎無男兒氣

其五

阿母不嫁女阿母故相惱教作繡鴛鴦鴛鴦是何鳥

捉搦歌

阿母三十育五女長作南隣北隣婦野雌遺穀伏雌乳
總為他人勞阿母

其二

黃絺作衫繡作裏貧家驅犢當駒使兒郎飽飯坐屋底
萬事不理問女子

其三

當門種葵棘蓋井卷毛生睫項垂癭成長二十不得逞
招將倩郎生作梗

其四

銷金中裙翡翠鬢千錢
觀僧結因果願奴生身勿再墮
負心兒郎行作我

折楊柳歌

懊惱楊柳枝
罕地黃金絲
門前不種爾
那得管別離

其二

妾腸如車輪
日日千萬轉
聞郎發咸陽
妾已在沙苑

其三

可憐孟諸岍春草綠芊芊兒騎漢馬牽著上床眠

其四

莫作中女郎懊懷不可言大姊得蚤嫁小妹得娘憐

其五

下馬繡盤龍上馬金襴襠男兒好光彩只是耀他鄉

其六

牝馬接神龍生兒尚為駒嬌女嫁僕夫生兒喚作奴

其七

桃花二三月故愛東風吹阿母不嫁女忘取少年時

其八

桃花八九月樹頭無一枝女兒作阿母不作阿母癡

高陽王樂人歌

男兒但意氣不復論須錢無錢酒家過有錢酒家眠

其二

手攜雙雕弧射殺雙飛鳧不將向家去將向酒家胡

雀勞利歌

塲禾肅肅雀勞利雄雀嘯飽向天外

二十兒郎太狡獪來如調饑去如掣

讀曲歌

歡擲芙蓉花悴如菰菰草歡不見儂時芙蓉也應好

其二

寶粧千金轡香刻六萌車將歡過南陌見者拚髭鬚

其三

流蘇三重帳歡來不知曙誰遣亂烏啼恨殺庭前桺白

樹

其四

為歡製衣帶秋風吹瘦儂歡腰詎偏耐

其五

奈何許魚吞熊膽鉤銜苦不得吐

其六

人言歡薄情儂道歡不薄歡家販吳絲新綺是儂著

其七

青菱白板舫絲係雙橋柱儂道殊可憎只解將歡去

其八

竹竿何籬篴湛井不到底歡持眼色去那得復盼爾

前溪歌

鄰家俱種桑儂自種黃葛那得四時寒與歡裁衫襖

其二

竹竿何籬篴上有馨香餌兩魚參差到不知合誰死

其三

儂家十畝竹箇箇青琅玕與郎作怨耦俱作湘妃癡

其四

竹竿何籬篴釣餌何馨香前魚方吞吐後魚自徬徨為
儂死不妨

其五

沙糖將黃檨俱是業中味歡真釀師手一言千條淚
青陽度

歡愛二月風吹枯作紅紫儂愛五月風吹花結成子

其二

玉勒紫絲韁是郎果下駒到門不肯走識儂雙桃花

上聲歌

聞郎好新變緩歌為上聲危絃依柱走猶是故時情

其二

百層黃蜂蠟裏有蘇合油不得郎手摩芬芳中自愁

懊儂歌

布帆珂我頭飛花自在流歡飲宜城酒那得憶揚州

其二

手挿桃李樹先祝嫁東風歡將盛年去留哀擲與儂

長樂佳

南州翡翠鳥雄來太液池得魚不肯食銜著待其雌

其二

十二金鳳皇一一銜明璫八角合歡帶歡不在中央

歡聞歌

感歡千金贈亦擬報千金數盡人間物無如儂寸心

歡聞變歌

不知歡心變約儂月出時歡自知月晚要接儂家雞

其二

耶婆不肯睡呼儂到五更歡如樹頭鶻儂似韝中鷹

其三

小妹笑大姊結歡莫作儂東垞鴛鴦橋不見雙飛虹

石城樂

歡來迎石城歡去送石城生憎竟陵水解作兩般聲

三洲歌

龍鬚編作席象牙裝作床不用儂雙腕那得穩著郎

丁督護歌

督護初北征揮手便作去可憐楊子水畫成死生路

其二

紅羅八角帳摺摺駕鸞嘴懊念丁督護不肯為儂死

華山畿

華山畿天地為情轉生人作鬼妻上有石蓮花是儂洗

頭池

碧玉歌

碧玉好女兒自謙無傾城阿大李家姊枉得佳人名

白團扇歌

郎持白團扇商風來吹袖寧為便拆壞不忍離郎手

明下童曲

結束珊瑚鈎龜躍果下騮問渠那得爾祖父豫章侯

同生曲

郎年十六少十五女有餘攜手西陵下瓊瑤雙不如

採蓮童曲

蓮童白如雪見儂眼相媚儂家在南垞井傍雙楊樹

江陵女歌

流澌結作冰冰化復為澌與郎心相變還我未見時

青陽度

堂前女蘿草纏綿依松栢雖懷千秋契亮無齊年質

襄陽蹋銅鞮

重鎧飛上馬桃花汗金鈴兒是襄陽客助汝下臺城

採桑度

東家乞蠶種西家乞柔桑桑蠶尚未得許歡製衣裳

其二

使君停五馬不復顧蠶饑儂不食桑葉那得腹中絲

翳樂

百淬揚州水秦王照膽銅歡令心意變不將持贈儂

那呵灘

郎來如上灘五步三步留郎去如下灘腎疾不同頭

又

儂歸亦未久歡去俄已遠下水一尺深上篙一尺短

夜黃

鳳皇一雙飛百鳥尊為王儂今粧洗去與歡助輝光

夜度娘

昏星送儂去晨星送儂歸牕前百種鳥為誰不安栖

雙行纏

兩窩尖尖玉秀出金蓮花生憎寘地上腕臂作交加

長松標

嫋嫋千尺藤亭亭百尺松但令根株近到頂作相逢

來羅

並蒂青蓮花下覆雙鴛鴦秋風昨夜來那得似儂長

其二

步出西昌門行經少年道所遇無故物焉得不連老

白符鳩

郵酒銀絲鯽留歡不肯住鵲洲風浪起歡今那得去

阿子曲

東家挽郎歌西家嫁女哭郎作口頭語那得見衷曲阿

子汝聞否

孟珠

手種天桃花與歡同顏色花若解人意那能不親惜

黃鵠曲

黃鵠摩天來金衣菊為裳啞喋稻禾美不復顧高翔

其二

黃鵠摩天來不及青鴛鴦鴛鴦雖小鳥出入定成雙

嬌女詩

兩山東西峙一水中間流上有雙棲鳥下有並泳魚儂
自羞見汝抱影守寒廬

拔蒲

七尺水中蒲下有三寸白語歡勿盡根留為來年息

壽陽樂

可憐秦淮水送郎舟詎作向西流

其二

篋中辟寒金製成釵故試郎君懷

其三

泥金沙棠舫候郎來春水沒篙長

其四

織成紅半臂化為碧是儂相思淚

宿阿曲

玉帝投寶壇上清為辟易高真辭牒去收奏不遑食

安東平

荒雞嘍喔殘月沈魄三三五五小星不沒

其二

慚愧小星導郎歸程要郎指誓莫負此星

其三

吳絲越羅製郎中裙曷不為衣與郎體親

其四

報儂白玉雙龍連環但令一心不在多端

又

孟冬十月雨雪霏霏入門孤冷出門沾衣

其二

夾河為家期至無船搖心失望不見所歡

其三

交南龍鬚百錢一尺是我手製與郎作席

其四

奉郎坐卧偕郎起息懊懷微軀生不如席

其五

博山沈烟以祈上玄願郎一夕不願百年

青驄白馬

青驄白馬汗連錢來往跼跋驕可憐

琉璃紫鞍光射人倏忽滅沒化若神

有足不作女行纏那可跼踏守故園

東鄰雙纏鴉頭襪生老不踏門前月

金瓶梅詞話卷之七
馬蹄燂電耳決風何不遣置迎取儂
嬌娘逞嬌不肯行碧幃五步一步停
嬌娘到時不逞嬌銀缸總帷可憐宵
唱著可憐令人惱久唱人憐令人老

共戲樂

玉燭煖煖調化機日月寒暑生四時
梁肉美酒合大譙骨騰肉飛赴流湏
揚袂順風去若輕徘徊顧盼若深情

僊僊妙舞樂未央陛下萬壽民悅康

鉅鹿公主歌

七萌香車五華旆黃犢遙遙出花外
去如流飈不相待餘芬吹塵帖裙帶
鉅鹿公主殷郎妹萬乘玉體慎自愛

烏夜啼

牕前白頸烏雙飛復雙栖不知何懊惱猶自恰恰啼

其二

歡作馬行客妾歌烏夜啼妾啼端憶汝烏啼今為誰

西烏夜飛

撲邀烏夜飛去踏誰家樹歡須無兩翼教住不肯住

女兒子

猿啼一聲髮一變不待出峽鬢如霰

上牢雖遲下牢險玉筋分殘女兒臉

子夜吳歌

採桑長干陌綠葉正耗耗遠駐青驄馬相遺玳瑁簪不

愁無語對歸恐悞春蠶

其二

蘭橈太湖曲垂柳覆金堤香氣時時發歌聲處處殘
粧汗欲盡留著可憐眉

其三

姊妹欺相命星前閉洞房攜燈挑促織羅襪下東廊明
日爭邀賭釵頭金鳳皇

其四

魏綸依小閣鸚鵡寫流霞錦瑟盧家女溫香玉辟邪推
牕見飄雪驚道是楊花

子夜春歌

雙枕不成起單枕不成眠春風饒冷暖吹作兩種天

子夜夏歌

人言儂多愁儂愁信非一不植春時花要結夏時實

子夜秋歌

秋風擊百卉憔悴無光澤儂能破一笑還儂春時色

子夜冬歌

漫天一夜雪門前
解消未憎儂去時
跡非關殢儂睡

子夜警歌

並蒂芙蓉枕下壓
金鴛鴦教妾成獨
自若個不成雙

子夜變歌

長干月爛漫是郎
初變時莫謂無情
點耐作有情癡

七日夜女歌

一夕當一年一年
千萬年不那扶桑
君驅輪警我眠

長史變歌

莫呼儂作官官今不得脫那能人上死乍可草間活

黃竹歌

黃竹生來黃不煩喚為碧與孃作籠具共誇真金色

聖郎曲

來亦不寂寂去亦不匆匆曲蓋飄婀娜旌旛結玲瓏不煩宛姨導知他兩心通

白石郎曲

白玉連環與雪等色置郎腕中不辨誰白

青溪小姑娘曲

小姑娘出門日射雨繚小姑娘歸來日抱虹腰

湖就姑曲

湖就赤山足大姑芬於蘭次姑白於玉

姑恩曲

鵲雛二三月毛羽如長雛為感姑恩養徬徨不忍飛

江陵曲

江陵城外地處處青樓曲百錢一買醉千錢一買宿

作蠶絲

別儂浴蠶日忽作綠繭時儂不食桑葉腹中那得絲

楊叛兒

六尺龍鬚席尺二虎珀枕甲夜不見儂丙夜不成寢

蹕林歌

雙行馬單白羽蹕林祭天集諸部脯索駝鹵駒駢新秦

家家買僮奴

自君之出矣

自君之出矣不復吐嬾婉思君如車輪腹中千迴轉

浮游花

儂作樹頭花日日波上紅歡作波上花浮游無定踪

武夷深

于嗟武夷一何毒煎飛鳶站站墮人馬前疇能銜恩貪
百年

登樓曲

登高欲窮趣眺望反傷神方悟冶游子無地不宜人

映江曲

杏臉楊柳眉秋江映如靚那能映妾心令君一察識

永明樂

玉燭調五夜金輪馭八方合唱永明樂嵩呼應神皇

春江行

春江浪拍天兩岸吐春烟中流一點黑知是下江船

江皋曲

白浪接天高黑風不斷號報郎輕舴艋不敢向江皋

憂且吟

絲桐在秋色秋色在絲桐一彈鬢已變何煩奏曲終

樹中草

共承雨露恩俱作青袍色方朔與侏儒根柢不相直

越城曲

秦望畫中山若耶鏡中水十家九浣紗為取苧蘿女

從軍五更轉

一更明月寒歌舞帳中殘酒為壯士膽獨騎斬樓蘭
二更刁斗鳴却比搥衣輕南風好吹去併作斷腸聲
三更月未斜淒切送胡笳天山無草木空聽落梅花
四更山月昏屈指舊從軍白骨年年是何人入玉門
五更聽烏啼烏是汝南雞閨中雙玉筋點點為遼西

採菱曲

蜻蛉刺水去不復畏歌斜渠自愛菱角儂自愛菱花

江南樂八首

少小閭門住不愛閭門道約伴禮社還羞人道儂好

其二

牕前櫻桃樹纍垂紅韎鞢儂愛結子時的應勝花發

其三

與歡皋橋別日日上皋橋不比西陵浦唯看兩度潮

其四

妬殺宜城酒夜夜將歡醉昨夜歡不來翻憐醉時味

其五

郎家流蘇帳對對玉蟠螭登車辭阿母強作數行啼

其六

聞歡夜中語輕舟汎若耶興闌須返棹來潑雨前茶

其七

東女日鳴機西女日條桑儂今袖手坐綃綺亦盈箱

其八

芍藥百種花真紅大難得儂家衆姊妹無儂好顏色

估客樂

醉後美人舞落花江上席不是此地堪何緣作估客

襄陽樂

大隄諸女郎粧成出芳閣瞥見千樹空餘花亂飛落道
是避妾粧不信風雨惡

江南曲

歡似吳江水西去不通潮妾如獨活草無風長自搖安
能對閨闔暮暮復朝朝

其二

庭前百合花露冷烟脂赤對鏡理新粧羞他好顏色從
此不簪花恐歡心更易

其三

楊花眠更起飛向阿誰家曲檻青絲箔雕鞍白鼻騮壚
頭無那醉小婦摘琵琶

其四

西湖水似油嫋嫋采蓮舟雙鬟正十五垂手玉葱柔羅
帶飄相近風波可自由

烏棲曲

碧烟作幙月作鉤
雙星熒熒對如眸
天雞叫昏日吹海
歡娛辭人不能待

其二

城烏啞啞喚春曙
只解將啼誘郎去
玉籠金索嬌鸚哥
呼郎不來奈爾何

其三

青紗羃羅象牙轂
皎如柔水浸溫玉
還君一掬鮫人珠

持將染衣茜不如

其四

寧馨玉兒雪白馬絲鞭軟垂不相捨
妾家采菱東渡頭
來往風水木蘭舟

江南弄

江南百花百般香
江南少娃百樣粧
百端撩人百念狂
百念狂殊未已
千歡盡萬恨起

龍笛曲

蒼龍嘯波夜沈寥美人如雲袂飄飄歷亂纖玉啟櫻桃
啟櫻桃吹楊柳度關山盡回首

鳳笙曲

瑞壚獸焙蜀錦牀要眇倡鳳復和皇餘音彌彌鬱金梁
鬱金梁宿流烟與女偕逝維山

後採蓮曲

密葉藏艇花迷粧中有清歌逐芬芳隨風去來咽復揚
咽復揚雨繚起摘葉歸忘收子

採菱曲

下裙鵝黃衫藕絲撥蔓纖指玉參差採菱傾筐露未晞
露未晞甘且芳折腰紅持贈郎

朝雲曲

巫雲欲闌接朝日流輝鬪豔無定質若戀如驚態非一
態非一境將殘擬追尋渺無端

秦箏曲

咸陽少娃十三餘十三新絃鶯不如商偏羽弱調烏烏

調烏烏和纂纂新歡長舊歡短

趙瑟曲

素女留絃清且悲誰其工者邯鄲姬玫瑰貼柱黃金徽
黃金徽白玉管儂意長歡意短

游女曲

雙蛾作眉鴉作髻睂波芙蓉近相媚不買新豐意先醉
意先醉可奈何千金舞百金歌

陽春曲

楊柳穿地萬千絲金堤碧桃花吐萼攀條折花將遺誰
將遺誰心自了人耳多黃耳少

莫愁樂

遠渡碧桃花停鞭白鼻騮客程無暇問先訪莫愁家

弇州四部稿卷七